

ՇԱՅՐԱԳՈՅՆ ՊԱՏՐԻԱՐԺ
ԿԱԹՈՂԻԿՈՍ
ԱՄԵՆԱՅՆ ՀԱՅՈՑ
ՄԱՅՐ ԱԹՈՒ Ս. ԷՃՄԻԱՇԻՆ



SUPREME PATRIARCH
CATHOLICOS
OF ALL ARMENIANS
MOTHER SEE OF HOLY ETCHMIADZIN

Ն. Ս. Օ. Տ. Տ. ԳԱՐԵԳԻՆ Բ
ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ՊԱՏԳԱՄԸ ՍՈՒՐԲ ՅԱՐՈՒԹԵԱՆ ՏՕՆԻ ԱՌԻԹՈՎ

(Մայր Աթոռ Սուրբ Էջմիածին, 2003 թ. ապրիլի 20)

«Հաւատով ճանաչել զնա եւ զգօրութիւն
յարութեան նորա» (Փիլ. 3. 10):

Սիրելի ժողովուրդ հայոց ի Հայաստան, յԱրցախ և ի Ափիւռս.

Քրիստոսի հրաշափառ Յարութեան խնդութեամբ են լեցուն հայոց եկեղեցիները այս առաւօտ, և Մենք Սուրբ Էջմիածնի՝ հայոց Մայր Տաճարի 1700-ամեայ Աւագ խորանից Հայրապետական սիրով յղում ենք ձեզ «Քրիստոս յարեալ ի մեռելոց» Ձատկական ողջոյնը:

Կիրակնօրեայ այսպիսի մի առաւօտ էր, երբ Երուսաղէմում Քրիստոսի մայրը և նրան ընկերակից բարեպաշտ կանայք համաձայն սովորութեան զնացին իւղով օծելու երեք օր առաջ գերեզմանում դրուած Քրիստոսի մարմինը: Վիմափոր գերեզմանին հասնելով՝ նրանք զարմանքով տեսան, որ մուտքը փակող մեծ ժայռաքարը ետ է գլորուած: Տարակուսած հոգիներին իւղաբեր կանանց հնչեց հրեշտակի ձայնը, որ աւետում էր. «Զի՞ խնդրէք զկենդանին ընդ մեռեալս, չէ՞ աստ, քանզի յարեալ»:


Ողջունաբեր այն օրը շնորհն ու օրհնութիւնը նորոգեցին տիեզերքը, և փրկութեան յոյսը դարձաւ ճանապարհ: Այդ օրից ի վեր ամեն ոք, ով ունկնդիր է «Քրիստոս յարեալ ի մեռելոց» հրեշտակածայն աւետիսին, ով հաւատով ճանաչում է Քրիստոսին, գիտի, որ գերեզմանը սոսկ վերջն է երկրային կեանքի, բայց սկիզբը՝ յարուցեալ յաւիտենական կեանքի:

Այս աշխարհից է սկսուում յաւիտենական կեանքը, երբ մարդու երկրաւոր ընթացքը հաւատով ու սիրով առաջնորդուած է դէպի Աստուած, դէպի Փրկիչ Տէրը, որ մարմին առաւ Աստուածային Իր Սիրով և աշխարհ եկաւ մեր փրկութեան համար, խաչի վրայ մահը խորտակեց և Իր Յարութեամբ մեզ կեանք պարգևեց:

«Հաւատով ճանաչել զնա» կոչում է մեզ Տիրոջ առաքեալը, որովհետև հաւատն է ճանաչելի դարձնում Քրիստոսի յարուցեալ ներկայութիւնը մեր կեանքում, վերափոխում մեր հոգիները, զօրացնում մեզ դէպի բարին մեր ընթացքներում: Հաւատից է ծնուում մեզ Աստուծոյ հետ կապող սէրը, և սէրը, որ եղբայրացնում է մարդը մարդուն, որպէսզի յարութիւնն ու կեանքը յաղթանակեն մեր գործերում, և մենք ունենանք խաղաղութիւնն ու հաշտութիւնը միմեանց և Աստուծոյ հետ:

Առաքելական քարոզութեամբ մեր հայրերը ճանաչեցին ու սիրեցին Փրկչին: Հաւատացին, որ Յարութեան յոյսը և զօրութիւնը խոստացուած է նաև փոքր ածու մեր ժողովրդին, որ Փրկիչը մեզ է ուղղել Իր խոստումը, երբ ասաց Իր աշակերտներին. «Մի՛ երկնջիր, հօտ փոքրիկ, զի հաճեցաւ Հայր ձեր տալ ձեզ զարքայութիւն»: Տիրոջ

21083-262



72-2003

խօսքի վստահութեամբ ապրեցինք, դիմագրաւեցինք մեզ բաժին ընկած անհամար ցաւերի, կեանքով յաղթեցինք մահուան ճանապարհներին: Յարութեան պատկերը կրող մեր հոգին դողշմուեց մեր հողին, մեր քարերին ու վանքերին, մատաններին ու երգերին, և երբեք չդադարեց Տիրոջ փառաբանութեան օրհներգը մեր շուրթերին: Արդարև, փառք և գոհութիւն երկնաւորին, որ փրկարար Իր խաչով մեզ պարգևած յաղթական հոգևոր մեր զենքը՝ Լուսաւորչի Սուրբ հաւատքը, նոյն զօրութեան նոր զարթօնքով կապում է մեզ մեր աւետեալ երկրին ու նրա սրտում կանգնած Սրբութիւն Սրբոց Միածնաեջ Տաճարին:

Սիրելի ժողովուրդ հայոց, խաչելութեան մեր երկար ճանապարհները աւարտուել են Յարութեան առաւօտով, և Յարութեան յոյսի նոր լուսաբաց է ազատ մեր Հայրենիքում ու ազգային կեանքում: Ձատկական այս առաւօտ, երբ երկինք նայելով բացուած ենք տեսնում Աստուծոյ ողորմութեան դռները մեր առջև, յարուցեալ կեանքի նոր հրաւեր է հնչում մեզ՝ հաւատով զօրացնելու մեր անհատական կեանքը և վերակառուցելու հաւաքական մեր կեանքը: Դժուարութիւններ ունենք, պիտի ունենանք նաև դրանք յաղթահարելու ուժն ու զօրութիւնը: Նայենք խաչքար դարձած մեր ժայռերին, երկնահայեաց գմբեթներին հայոց եկեղեցիների, և նրանք պիտի խօսեն մեզ մեր հայրերի շուրթերով, պիտի խօսեն ու պատգամեն միասնական լինել Հայրենիքի ազատութեան սիրոյ և Սուրբ խաչի ամենագոր թևերի ներքոյ, և մեր միաբանութիւնը պիտի լինի մեր զօրութիւնը: Անկախացեալ Հայաստանն ու Արցախը այսօր ամենից առաւել խաղաղութեան կարիքն ունեն, կարիքն ունեն մեր նուիրումի ու անձնուրաց ջանքերի: Մեր տունը, մեր գիւղն ու քաղաքը, մեր եկեղեցիները մեր հողի վրայ բարձրացնենք ոչ միայն հայրենի լեռներից բերուած քարերով, այլև մեր սրտերի մէջ բնակուող Աստուծոյ սիրով, մեր հայրերի աւանդից ու մեր պատմութիւնից առած ներշնչանքով: Մեր ափերի մէջ պիտի զօրանայ մեր Հայրենին ու դառնայ երկիրը իրականացած մեր յոյսերի: Ամեն բարի լոյսի հետ օրհնենք սկիզբ առնող ամեն օրը ազատ մեր կեանքի, օրհնենք հաւատով ու հաւատարմութեամբ և մեր զարթնեալ հոգու վստահութեամբ կառուցենք հայոց բարօր ներկան ու գալիքի տեսիլքը, որ լոյս է առնում Լուսաւորչի անմար Կանթեղից:

Հայրենի երկրից գաղթած և հեռաւոր երկրում ծնուած սիրելի հայորդի, Իջման Սուրբ Սեղանի առջև Հայրապետիս աղօթքն ու մաղթանքն է, որ Փրկչի հրաշափառ Յարութեան լոյսը յարութիւն բերի քրիստոնեայ հաւատքիդ և նորոգի հայ մնալու ուխտը: Պահիր հաւատարմութիւնդ Առաքելական մեր Սուրբ եկեղեցուն, աւանդդ սրբօրէն պահպանիր ու փոխանցիր քո զաւակներին և մի մոռացիր հայրենի հողիդ մի անկիւնում վերադարձիդ սպասող պապերիդ շիրիմները:

Ուր որ ապրենք, սիրելի ժողովուրդ հայոց, Հայրենիքում, թէ նրանից հեռու, թող մեր հոգին ծաղկի Արարատի զաւակները լինելու հայրենասիրութեամբ, Փրկչի յաղթանակած սիրոյ զօրութեամբ, և մեր հայրերի Աստուած պիտի առաջնորդի մեզ նոր յաղթանակների: Ուխտենք հաւատարիմ զաւակները մնալ Սուրբ Էջմիածնի Միւռնի, որով մեր ճակատին ունենք Յարութեան կնիքը և որդեգիրներն ենք Քրիստոսի, ու մեր ճանապարհն է «Հաւատով ճանաչել զնա եւ զզօրութիւն յարութեան նորա»:

Սուրբ Յարութեան հրաշալի աւետիսով Ամենայն Հայոց Մայր Աթոռից եղբայրական Մեր ողջոյնն ենք յղում մեր եկեղեցու Նուիրապետական Աթոռների Գահակալներին՝ Մեծի Տանն Կիլիկիոյ Ն. Ս. Օ. Տ. Տ. Արամ Ա Կաթողիկոսին, Երուսաղէմի Հայոց Պատրիարք Ամենապատիւ Տ. Թորգոմ Արքեպիսկոպոս Մանուկեանին, Կոստանդնուպոլսի Հայոց Պատրիարք Ամենապատիւ Տ. Մեսրոպ Արքեպիսկոպոս Սուբաֆեանին: Աղօթք ենք բարձրացնում առ Տէրը Յարուցեալ, որ անսասան պահի Առաքելական մեր Սուրբ եկեղեցին Նուիրապետական իր

Աթոռներով, աստուածային շնորհի մեջ պահպանի ուխտապահ ողջ հոգևոր դասը ու սիրեցեալ հաւատաւոր համայն մեր ժողովրդին:

Հայրապետական Սեր ողջոյնն ու օրհնութիւնն ենք բերում հայոց պետական աւագանուն՝ գլխաւորութեամբ Հայաստանի Հանրապետութեան Նախագահ Տիար Ռոբերտ Քոչարեանի, Արցախի ինքնորոշման իրաւունքի ճանաչման մաղթանքով՝ Լեռնային Ղարաբաղի Հանրապետութեան Նախագահ Տիար Արկաղի Ղուկասեանին և Արցախի արդար դատի յաղթանակի համար բոլոր ջանացողներին:

Աւետաւոր այս առաւօտի բերկրանքով ողջունում և օրհնում ենք Հայաստանում հաւատարմագրուած դիւանագիտական առաքելութիւնների մերկայացուցիչներին:

Սիրելի բարեպաշտ ժողովուրդ, Քրիստոսի հրաշափառ Յարութեան լոյս խորհրդի առջև աղօթենք միասնաբար և հայցենք. Տէր, Դու որ Արեգակն ես Արդարութեան և Իշխանը Խաղաղութեան, Քո Յարութեան ամենակեցոյց զօրութեամբ իջիր մարդկանց հոգիներին, պարգևիր սփոփանք վշտացեալներին, տրտմածներին՝ ուրախութիւն, սգացողներին՝ մխիթարութիւն, միմեանցից բաժանուածներին՝ միութիւն և սէր, փորձութիւններից երկիւղածներին՝ քաջաւերութիւն ու արիութիւն: Խաղաղութեան Քո ողջոյնը տարածիր աշխարհին համայն, յատկապէս՝ Երկիր մոլորակի՝ մեր ընդհանուր տան այն շրջաններում, ուր վտանգուած է խաղաղ ու ապահով կեանքը, սասանուած՝ վաղուայ օրուայ հանդէպ մարդկանց հաւատը: Թող Յարութեան յոյսը, շնորհն ու օրհնութիւնը լինեն մեզ հետ և աշխարհի՝ այսօր և յաւիտեանս. ամէն:

Քրիստոս յարեաւ ի մեռելոց

Օրհնեալ է Յարութիւն Քրիստոսի: